

平山書古文抄

定山堂古文小品卷下

疏

募修學宮疏

天下事不大壞則不大治。破廢之氣積之百數十年而潰發於一旦。當其積也。一飭舉之無難。而迨其一旦潰發。雖矻矻支柱。亦孔棘矣。蘄於諸邑稱望。水紆山鬱。蒸為輿區。翹秀之風。莫最於人士。故吏治先治士也。然而治士者治其地。今夫學宮固土地哉。環堵之室。吾師託處焉。琴篋鐘瑟之器。書策禮射之文。於是乎出。博士所依而守也。諸弟子所習而遊也。譬之良農之圃矣。蕪不可掃。奈之何稱良。吾入國而問士。有終其身未趾及乎泮焉者。即奈何儼然儒服也。維春及秋。邑子奉俎豆從事。青青子衿。亦閭寥焉。其心荒矣。故士不自有其地也。不自有其地則不治。地不治則無從乎治士。夫蘄之彬彬。乃無士焉。長吏之罪也。而不見夫緇髟羽流之於梵刹宮宇乎。聚徒而廬之。丹雘其表。金碧其裏。龍鬼星日。相焜煌也。稍不戢。則持疏而出。朝弋朝獲。暮弋暮獲。家無異喙。人有爭心。何其肯也。以吾門冠蓋之衆。文采之侶。高談渺議之人。相聚百里內。而一旦

視其師露處乎敝瓦摧棟之下。行且壓焉。反不能如縮髮羽流之自樹也。而吾安之乎。故欲士自治其地。又莫如治先聖之地。即不大治亦無令大壞。舉百數十年。因循忍薄之氣。一旦洗以翻然勃然。不能自安之意。豈惟吏道其罪。士亦與有榮焉。自廟始者。神之所憑也。明有始也。明有崇也。今自割俸。餘雖繕備。餼兵以來。橐可垂矣。不敢不勉者。先乎其自責也。鄉大夫之亦與乎此者。不忘乎所自出也。且以云有後也。士其本業也。無貧富一也。隨註即輸。無往返延閣。便成事也。各發大願力。歡喜悲歎。於焉集也。

祈禳火災疏

伏以厥徵曰咎。惟上帝鑒予之辜。其應匪文。率下土敬天之怒。既束身以謝過。兼洗心而乞憐。念某待罪此疆。歲云六度。奉職無狀。積有萬端。寔命不猶。遭時孔棘。骨戰時因。秋老眉愁。不為春開。瓜已及而遲遲。薪未休而草草。驚烽在目。慨千家之百存。帶甲滿原。苦兵來與寇往。梨花細雨。誰憐野泣之魂。燕子舊巢。莫慰羈人之夢。澤袍與共。環陣之日月偏長。杼軸其空。按堵之生涯苦短。魴憂在尾。鼠適何郊。民氣凋傷。殺機纏互。干和兆戾。日盛月深。原其所由。皆在長吏。

遂乃鑿觀有赫。因之震怒頻加。值此三春頓遭一炬。狂飈大作。烈燄遽張。起自近縣之西隅。幾徧通城之萬戶。譙樓煙滿。沈沈莫問。鼓鐘華棟。雲飛莽莽。但餘瓦礫。蓬樞甕牖。立見消殘。斗粟尺絲。都歸煨燼。災氣上騰。乎飛鳥驚。殃下及於游魚。日欲瘦而巷空。夜未央而婦哭。訊之父老。百年無此奇災。目彼顛連。五內有如芒刺。某政慙滅火。既不能轉禍為祥。力怯救焚。又不獲噓枯成潤。感一言而退舍。念彼前人。合五事以責躬。寔惟今日。伏願冥冥之下。閔茲渺渺之忱。謂百姓之多讐。悉一人之溺職。盡蠲夙惡。特霽新恩。倘孽不可違。罰止及其身。勿逮其下。若過猶可補。俾以捍大患。并禦大災。庶哀我瘁人。不致抱靡室靡家之怨。而凡茲氓吏。亦爭懷省月省日之思矣。

祈壽保安疏

伏以家庭有自然之佛。歸而求之有餘。顧復真罔極之恩。天與親焉。則一敬皈大慈之三寶。用懺小人之百愆。伏念某身匪空桑。遇同食蓼。崎嶇九死。空復稱子稱人。斷送一生。豈止慙卿慙長。批鱗甘蹈刃。久貽父母之憂。臨難歎結纓。遂抱忝生之恨。謬謂盡忠者不能盡孝。詎意負君矣。即以負親。有分羈愁。無家菽

水望雲目斷。夢中烏鵲頻飛。嚙指心驚。亂後庭闈何處。踟天踏地。輟行役以無期。問烏尋魚。想南音而如歲。是豈特尋常去國懷鄉之感。亦豈若他人兒女瑣屑之情。茲者適值吾父之五旬。徒馳遙憶於千里。誰褰萊袖。寫春暉寸草之心。縱有頽羹。迷烽火經年之路。念子舍之寥邈。愧人理之荒蕪。箭鏃通天。錐曾即血。風濤滿地。回首知航。恭惟諸佛諸大菩薩。願衆生皆為聖賢。如慈父之求亡子。其於斯事。能不惻然。用是親叩旃檀。虔申悲仰。上祈佛力。默佑遐齡。俾鳩杖婆娑。報平安於花竹。抑眉旣懽洽。欣並茂於椿萱。五福之大。曰壽曰康。甯三祝所難。忘辱忘憂。懼老人胸中無一事。煙雲供養。咸稱邱壑神仙。百年以內。皆太平。日月銷兵。重慶村醪社鼓。世間何物最樂。遊子還家。人生得天。甚奢。雙親無恙。烏頭白馬。生角轉眼。輕帆順水。頓忘天涯聚會之艱。蘆有子芥。添孫終身淡飯。粗茶絕勝五鼎三公之奉。庶幾偷生面目。對甘旨而稍釋慙惶。但得愛日舒長。捐身名而亦無遺憾矣。

亂後得家書為雙親祈佛疏

多難滄經。餘生何幸。連天烽火。披故國之音書。亂後庭闈。喜雙親之健好。一得

平安之耗。欣然復起為人。忍詬偷生。惟斯而已。屬茲芳旦。益茂靈椿。眉欲介而無從。草望暉而難報。敬抒誠懇。仰叩慈明。冀佛力之鴻施。佑遐齡於康吉。仁者壽。智者樂。高堂日永。惟有歡娛。朝倚門。暮倚閭。游子天涯。庶寬罪戾。

都門育嬰會募緣疏

自柴鍾兩居士倡善緣於寂照。而息翁金老先生。忘翁胡太老先生。護持攸助。不遺餘力。凡濟人利物之事。纖悉周備。一時善信。樂趣恐後。輪月捐施。歲無虛日。荒寺一區。遂為有識含生。極樂國土矣。顧檢拾枯骨有費。掩埋人畜有費。焚化柴薪有費。每月誦經禮懺。施食迴向。僧眾單銀有費。創修殿宇。堂寮有費。長住薪米香燭有費。而益之以收養遺棄嬰兒。則費尤不貲。蓋所收源源不窮。其費駸駸難繼。最急者無如催養乳母。及修造寺外餘房。無房則乳母少棲身之地。而散處不便稽查。無乳則嬰兒絕續命之膏。而坐斃尤堪憫惻。養生更重於恤死。盡人乃可以迴天。雖每月育嬰之約。向來已隨緣勸施。但規畫初定之時。未必即家喻戶曉。今金胡二大老相繼南行。眾嬰兒方來未艾。若不分任持鉢。共成勝因。誠恐事眾而力紛。或至急此而緩彼。敬為申告宰官居士。善男信女。

除收骨等項功德。輪月樂施。另聽發心外。凡我同心。各募知交。如願與育嬰會內者。每月每人捐銀一兩。務以月望徑送寺中。一歲既終。周而復始。要知此會。需為救命而設。與泛常施捨不同。人人有七級浮屠。刻刻種多生福果。更祈仁者。廣示導揚。各發宏慈。齊心拔濟。奪垂絕赤子於犬豕之口。挽一綫殺運於湯火之中。只捐華筵綺飾之纖毫。頓消血海刀山之業債。從此轉相激勸。到處擴充。使都城內外遠近。為人父母者。知他人斷送之子。旁觀尚爾收憐。豈自家骨肉之恩。忍心輒拋溝壑。主喻其僕。夫戒其妻。悲涕號呼。如救頭目。不特棄者可生。且令生者不棄。民物盡登仁壽。耳目無非吉祥。宏宣佛心。陰裨王政。人天悉知。悉見功德無量無邊。

生辰禮佛疏

某一介書生。五年勞吏。值兵寇洊加之日。百務交侵。居烽煙莽互之中。寸長未展。歲兼愁度。魂消清角之霜。鬢與星凋。秋老碧藥之月。幸瓜期之已及。慙馬齒以彌增。蒲柳半株。驚人搖落。荊松三徑。怪我栖遲。方期一船載石。留鴻爪於蘭水江邊。庶幾千里還家。拜鶴髮於西園堂下。忽奉如綸之詔。頓停輯瑞之車。在

聖人念切蒼生。使遊子羞言故國。曉雞夜火。鍊成冰雪之身。碎葉寒花。伴送關山之夢。會逢初度。人在離愁。酒盞懽疏。詩籤韻短。憶往昔長安市上。及年來清嘯樓頭。感芳艸之別。王孫天涯。鴈冷望綠楊。而呼蘇子。今古人遙。憐我類馬卿。空餘四壁。笑人如鄧禹。又添一年。暉在三春。媿班衣之五色。雲迷千嶺。抵家書以萬金。靜念我生之初。迨乎成人而後。早嬰世網。勉作勞薪。罪業牽纏。任情想皆為妄。設佛根消滅。即慧福豈曰良。因復我伊誰。莫伸情於菽水。小人有母。但灑泣於松楸。人天之度。脫何期。法力之慈悲。可借。為是敬登福地。誠進瓣香。躬叩寶光。嘿求懺悔。閔殘黎之出湯火。願言人樂春熙。指彼岸而破迷津。欣看兵銷日月。徵求稍息。吏不打門。桑柘常閒。婦無歎室。以汝萬家之豫。奉我二人之懽。鐘磬聲中。悟山聲之不斷。衲珠影裏。想秋影之無窮。天水同明。雲華空湛。豈直領取十載。本無出岫之心。即使浪蕩五湖。終覓歸根之處。

文

謝雨文

力田而望逢年。小人樂事。久旱而得甘雨。從古美談。惟閭閻以食為天。雖不疾

呼亦不可幸。大造從民所欲。置之死地。而後之生。不盡歷時世之艱難。抑安識元工之廣浩。是蓋幽微感應之理。夫豈人力勉強可為。伏念某草草徒勞。平平無取。處兵火七年之危地。撫凋殘半盡之遺氓。弔死扶傷。溫謫未回於比屋。勸耕課織。桑麻虛想乎太平。當百責之交攻。真一籌而莫展。既無辭以謝父老。惟悉力以叩穹蒼。假令積悃不通。十日猶然不雨。固已束手待斃。千家立見無煙。何意居高而聽卑。遂使有求之必獲。終宵泡澍如灌醍醐。兩部鳴蛙若聞絃管。士女共欣於郊市。農氓重理其耰耨。非無續命之膏。難斯普濟。亦有忘憂之草。莫喻奇慳。但得上尺下尺之頻滋。定知滿篝滿車之可祝。蝗當鍛羽。鷹亦斂威。消害氣於清颼。化愁城為樂園。從茲四方溝壑。或漸少流離轉死之人。即使徧地干戈。幸不添憔悴饑寒之鬼。合簪紳衿佩老叟童穉之象。而共沐恩私。舉風雲雷露昆蟲草木之情。而同歸君相。何以云報。惟知涕零。

禱雨文

元慈沐浴。無如當厄之深。羣命仰天。惟以祈年為急。憂深雲漢。誼切焦焚。雖屢乞而不休。施者將厭。必得請然後已。民其少甦。追惟旬日之奔馳。豈有精誠之

感召寒波方灼。赤土猶然。商羊不下於桑林。螟螣尚栖於中野。雲垂復散。曾何改山川草木之容。雨落忽收。幾欲穿父老兒童之眼。意木僊之致怨。非只四目六足之災。彼勞人其未康。徒聞北斗南箕之歎。過茲十日。無望三秋。况當災癘之後。益以凶荒。定知兵火之餘。難存皮骨。此患寔殷於眉睫。為憂不止於饑寒。四民之憔悴如斯。長吏之撫綏安出。我也歲也。致戾氣者多端。君乎牧乎。挽天心以何事。特資帝力。救此疲氓。解蒸鬱以甘霖。灑嘉禾以清露。俾蝨賊之立翦。必族類以無遺。炎氣息而人憩涼臺。田饁欣而歌喧士鼓。是為厚幸。咸被明庥。某待罪危疆。復丁奇厄。每當食而箸輟。亦中宵以涕零。雖麥穗兩歧。蝗不入境。對昔哲以多慙。而割髮及膚。翦爪侵肌。撫渺躬其奚惜。甘以一人之嚴譴。贖茲萬姓之無辜。實冀鴻恩。俯垂鑒允。

祭五義祠文

嗟嗟五子。死而可貴。為邑作翰。若天有緯。狂寇躡斬。颯馳釜沸。一旅遇之。以敵其愾。烈烈二徐。怒髯如蝟。蔡子文弱。致命則毅。方壺沈雄。程乃英畏。仰脰絕纓。同時赴義。山號水悲。念之歔歔。維此封疆。而獨盡瘁。身雖已矣。不朽者氣。祀之

特祠。侃焉靡愧。

戲作六送竈神文

某之送神。一年一度。神也伴余。歷霜如故。羗飄颻其遠征兮。孰使徘徊乎中余。渡匪牽之裳。匪枳之步。神亦莫言。余亦莫訴。蓋其冷淡寂莫。而寥寥無徒。遂乃遷延倚徙。而行行且住。奎在范兮。生塵。字未仙兮。飽蠹。因人以熱。朝骨相之。不倫。苦爨曰勞。悵風塵之遲暮。二十七種之滋味。傲五侯鯖。三百六旬之烹煎。吸幾斗醋。秋帆一曲。慚愧季鷹之鱸。夜話十年。潦落嬾殘之芋。惟神已飽。嘗乎鹹淡辛酸。而某亦漸諳於炎涼。緇素。煖氣呵欲活。得其門者。居然炙手之賓。冷面向伊誰背而馳馬。錯矣諸州之鑄。好戎自口。彼咫尺乎九閭。禍福何常。乃終年而一寤。某媚竈非工。逐貧無具。增五為六。徒懷駢拇之羞。錢往迎來。或逢煬者之怒。早知燈即是悔。已多時熟。從這裏過。依然再誤。殆亦奇鬼之所揶揄。而窮神之所竊附。伏願冥默鑒觀。吉祥保護。惟馨香是依。勿腥穢其吐。憐余八口之冰荼。蔽我數椽之風雨。庶幾式憑於水。降火升。而不等夷於木。鑄泥塑。更願自今以往。神折柳兮。贈余。急唱驪而首路。好作散場。毋相禁錮。鶯巢燕壘。別選東

鄰之栖馬骨槐根盡付南柯之遇我送人作郡亦送我作郡不為五斗米更復折腰侏儒飽欲死臣朔饑欲死留取百斛灰聊以滌污云爾

啟

五十謝客啟

五十之年忽焉已至未能聞道實愧知非念嚴慈見背者有年撫歲月如流而興痛兼之母喪在堂妻室連逝蒲柳彌增憔悴松楸日切夢魂屈指及墮地之辰回首盡傷心之事誓當謝絕酬應屏迹空山借禪誦以稍解悲哀卻葷酒而無滋罪業凡我同朝之垂愛幸為俯宥其不恭至於里門戚友四海知交倘命駕遣使之或煩必鑿垣踰垣而相避語出誠懇伏冀鑒原

引

靳茶坡詩小引

吾友方子爾止胡子彥遠世所稱高素間遠有道之士顧獨樂與淮海諸君子遊靳子茶坡其最著者也茶坡之詩亦高素間遠不為枝葉之言由其涵泳古人之學曠鑒當世之故深心易氣以出之故能淘洗一切如蒼山靜雲拔立塵

表其人與其言。皆鬱然道德之器矣。以是遊乎二子之間。其有合也固宜。今夫上林甘泉羽獵期門之鉅麗。從祠麟時奏賦熊館歲蕤輪囷固所坡所賭記。風塵澗洞駭機蹈谷蒸主父之鼎指崖州之圖朝舜敷而夕籜萎亦茶坡所睹記。歸與淑子拂膺頓輓攬虞山再彭眉生天醉諸子之袂菰蘆隱約倡予和汝颺國士之英風延桂叢之幽吹隰西香草風流未隕必有銜杯太息眺停雲而招印須者病夫其褰裳以俟矣。

李大樞梅花詩小引

涉江陳子為梅花詩十六首。廉頑立懦。冰雪孤行。一時和者多至數百首。而李子大樞與焉。皜皜亭亭。幽森娟妙。盛夏讀之。覺素霰自零。寒香不去。凌風卻月。水部讓美於揚州。玉柱金卮。總持再見於江左矣。大樞尊君為吾友。二則包英含傑。磊砢忠孝人也。釣月鋤雲。儵然千古。此其詩之本與。昔人謂宋廣平鐵心石腸。能作梅花賦。吾謂賦梅花者。乃能具鐵心石腸耳。請以質之涉江。

許茂勳詩小引

識茂勳於灌谿先生園中。幅巾蕭然。烟霞竟體。已讀其詩。高雲素月。遺世獨立。

淡水之味。遂逼陶韋。而孤往遐寄。恆不屑俯仰一切。與之涉靈巖。眺太湖。遙山青蒼。水天環碧。中有幽人之廬。采蓴釣鱸。居然桃花源遺意。昔孫綽許詢。並有高尚之志。為名流所愛慕。支公問綽君何如。許答曰。高情遠致。弟子早已服膺。然一詠一吟。許將北面。今茂勳含林壑之秀。復擅吟詠之美。揆諸昔人。固有兼長也。灌谿先生抱道深栖。門無雜賓。履烏而獨與茂勳清談名理。婆娑忘倦。中林二老。來往風流。詩固以人重哉。

問菊篇引

扁舟自南。霜深雁老。踏殘黃葉。一訪支公。曲徑斜陽。人影相亂。茆柴畫閉。簾扉冷香。歸而愴然。吾幾喪我。詰旦扣舷呼客。儼然道公。且不寒溫。袖中簌簌。爾許兩開拭淚。三徑存荒。冷淡槎枒。不因人熱。知其解者。孺立頑廉。此一孤吟。即何異采薇行歌。紫芝奏曲。吾為折角。復抗首而壯窮秋。記虎阜春陰。早梅如雪。及茲晚暮。重見幽花。中間氣盛。候張暄妍。何限在於今日。柯條攀撫。一往神傷。而公也。放言菊為遺老物。猶如此。感慨係之矣。少陵曰。舊摘人頻異也。不妨情至。栗里曰。悠然見南山也。其庶幾忘情乎哉。

清一上人募緣施粥小引

民勞甚矣。兵火滿原。溝壑無所。如行赤日中。靡有止息。得一二賢宰官。拯諸當危。俾餘喘獲甦。真如道暍時。一服清涼散也。熱病難療。誰當沃以醍醐。而清公津津好為德於塗之人。乃若此。

增壽寺募緣施粥小引

增壽寺粥廠。去年有靜海高何二公為之領袖。全活甚多。今兩公或暫歸。或公出。遂無董其事者。寺僧持鉢徬徨。謬以敝居相近。屬為綜理。僕貧兒無以為役。然竊念今歲饑民之望救甚於去年。頃且雪霰交飛。啼號盈道。仁人長者。觸目痛心。僕即不言。此事自難姑已。因為典衣鬻釧。稍發其端。削衲飯而俵丐漿。縮瑟可憐。所冀仁人長者。共成勝緣。一心推廣皇仁。一心自種功德。杜少陵云。朱門酒肉臭。路有凍死骨。省華筵於一夕。割歌管之數金。即可救活幾人。勝作佛事多許。矧聖人盱食長安日邊。財盡民窮。流亡滿眼。固卿大夫之責也。豈只寶山徒手。誼不忍以善因福果。獨讓二公哉。時初雪之夜。

贊

陳寒山小像贊

玉茗寫生。其人活在。吾以木叔配之。當其錫毛拂紙。逸趣橫生。猶想像箇中青
未了也。才仙情種。雙絕古今。曲江臂。京兆眉。木叔蓋已自道。縱日取碧簫紅袖
酒。誦詩瓢。為畫中人。供養。豈為非分哉。咄咄寒山。千百年後。不更慮後生描眉
抹角耶。

蔡義徵像贊

癯龍狷鶴。蒼管怪樂。眉憂髯怒。目語心諾。陰符夜叶。青霜鍰。滄海橫流。斯人邱
壑。

蔡伯郎贊

伊何人。秀而美。劍橫秋。筆生藥。致翩翩。殊自喜。疾銜枚。奪臬壘。黃金印。紫貂耳。
蓮花幕。府歌鐘起。為報將軍折屐齒。偉丈夫當如此。

朱蘭處像贊

秋林瘦。鶴唳尊。幽澗歇。草蟲言。風蕭蕭。葉滿原。行空山。弔石魂。詩何物。哉能換
人飽。溫茗椀。寂客到門。立而望之。楚王孫。

徵君黎君極像贊

少微之精處士之英。金渾玉璞。珠光月明。為陳仲兮。無慚公卿。生則徵車。歿祀於黌。展如之人兮。吾將景行。

題了菴像

是其風神在名山滄海之間。胡為乎左瓶拂而右管絃。豈有託而逃世。聊清歡以窮年。抑感憤磊落。時一寓乎瞿曇與偓佺。世固惜其文高九辯。技稱三絕。拂衣北闕之書。而歸理東臯之田。我則謂其挺安石鼻。抱梁甫膝。撥長源灰。而捫景略蝨也。斯人之憂樂。殆將與世相關矣。

劉遠公扁舟圖贊

角中蕭然。扁舟自喜。未能避世。聊復爾爾。澄之不清。此一泓水。為赤松孫。居柴桑里。蘆中人。蘆中人。豈非名士乎。

員烈婦贊

有莪其冠而遜此悃。有全則反而碎此壁。火宅青蓮。千秋標格。嚼齒結纓。齊芳等碧。僕也恨人。生慚貞魄。